

lis Gnovis

■ CINT. Libertât, democrazie e justizie

Seont l'Union dai Cumons talian ch'a smirin di mudà Regjon, il passaç di une aministrazion regjonâl in chê altre al è un fat di «libertât di siele teritoriâl de bande di une Comunitât», al è un fat di democrazie, par vie che lis proceduris stabilidis de Costituzion e des leçs a van aplicadis, e al è un fat di justizie, parcè che la volontât populâr si scuèn respietâle. Chest resonament, tornâ a confermâ, ai 25 di Mai, dal coordinadôr de Union, Francesc Frattolin, di chê strade dal passaç da lis Marche e l'Emilie-Romagne dai Cumons di Montecopiolo e di Sassofeltrio, al vâl tâl-cuâl ançe par Cint, il Cumon dal Friûl concurdiês sot Vignesie che dal 2006 al spiete che il so referendum populâr al sedi respietât. Prin di Montecopiolo e di Sassofeltrio, dome il Cumon di Plodn/Sapade, dal 2016, e i 7 Cumons de Alta Val Marecchia (dal 2009) a vevin rivât adore di ultimâ il passaç burocratic, ch'al à di jessi permetût cuntune leç statâl di pueste.

■ TURIN. Montagne e gjestion coletive dai Bens

Il «Journal of alpine research / Revue de géographie alpine», ch'al è une riviste scientifiche «on line», tal numar 109-1 / 2021, al fronte la cuistion de gjestion coletive da lis proprietâts su lis



montagnis europeanis e dal mont. Fra i studis e i scandais internazionài e multidisciplinârs, direzûts di Alessandro Crosetti de Universitât di Turin e di Jean-François Joye de Universitât Savoie Mont Blanc, al comparis ançe un articol su «Proprietà collettive e sviluppo locale. Elementi di ricerca per il Friuli Venezia Giulia (Italia)», par cure dal vieri funzionari regjonâl Maurizio Daici. Chei altris articui a proferissin esperiencis e formis di proprietâts coletivis de Corsiche, dal Maroc, dal Piemont, de Slovacchie, de Svuizare e dal Trentin. Il numar de riviste, intitulât «La montagne et la gestion collective des biens: quelles influences? quelles interactions? / Mountains and the Collective Management of the Commons: Influences and Interactions», al pues jessi let a la direzion: <https://doi.org/10.4000/rga.8071>.

■ MANIÀ. Curtis e bicicletis

Manià, in plui di jessi une vore innomenât come «Capitâl mondiâl dal curtis», al è daûr a confermâ un altri titul che, se nol è ancjemò mondiâl, al è za talian. A son cuatri voltis, di fat, che la Federazion taliane ambient e biciclette «Fiab» e nomene la vile dal Friûl occidentâl «Cumon ciclabil». In chest setôr, al spiche l'impegn dal Cumon, ch'al à inviât il progjet «Maniago Bike to work», ch'al vâl tant pe aministrazion publiche che pes aziendis dal teritori, ch'a son impegnadis a favorî i lavoradôrs ch'a intindin di lâ a vore in biciclette, metint a disposizion puecj adâtâts par molâ lis bicicletis, par cambiâsi e par lavâsi, cualchi incentif e une comunicazion di pueste.

Joibe 3	S. Carli Lwanga	Lunis 7	S. Norbert vescul
Vinars 4	S. Quarin vescul	Martars 8	S. Medart vescul
Sabide 5	S. Bonifaci vescul	Miercus 9	S. Efreim
Domenie 6	Corpus Domini	Il timp	Soreli plen.



Il soreli
Ai 3 al iève aes 5.18 e al va a mont aes 20.52.



La lune
Ai 2 Ultin cuart.

Il proverbi
Ducj i Salmis a finissin in glorie.

Lis voris dal mês
Il nestri ort nus da simpri plui primizis: cjapait sù salatis, ai, cesarons, ravanel, cicoriis, rucule.

Patrimoni de Umanitât

Ancje il volontariât al merte il ricognossiment «Unesco»

Il volontariât, cui siei valôrs e cui siei principis, al è il motôr de societât, che no rivarès a lâ indavant cence di cheste energie. Sburtade di cheste convinzion, l'organizazion di «Padue Capitâl europeane dal Volontariât» e à sierât la sô mission internazionâl, durade dai 7 di Fevrâr dal 2020 ai 30 di Avrîl dal 2021, stabilint di tacâ a operâ par che il volontariât al sedi proclamât «Ben imateriâl Unesco de Umanitât».

In curt, a saran inmaneâts i Comitâts ch'a coventin par argagnâ e par prudelâ la candidature uficiâl. Rivocant lis peraulis che il president de Republiche, Sergio Mattarella, al veve ditis za fa un an, screant il program anuâl des celebracions venitis, Emanuele Alecci al à sclarît, in dite dai promotôrs dal progjet: «Cheste propueste e à fondis saldîs, stant che il volontariât al è un element necessari pal svilup moral e civil di ogni Nazion. Al è un ben prezios, un capitâl e un patrimoni ch'o vin di protezi e di sostignî». Al è ben par chest, al à continuât il president di «Padue Capitâl europeane dal Volontariât», ch'al è necessari che «il volontariât al otegni il ricognossiment Unesco



Il manifest prontât dal «Cv» di Padue e di Rovigo par proponi la candidature internazionâl

La candidature e je stade decidude in conclusion dal an che Padue e à fat di «Capitâl europeane dal volontariât»

tant che Ben no materiâl. Cheste candidature e merte jessi judade e puartade di dutis lis fuarcis ativis in Italie, partint dal mont istituzionâl, politic, academic e culturâl. Parcè che dome s'ò lavorarî duçj, in convigne e in armonie, o rivarî adore di otigni chest risultât. L'impegn par prudelâ la candidature mondiâl al sarâ guidât dai principis de gnove «Cjarte dai Valôrs dal Volontariât» che, vie pal an, e je stade metude

in zornade in grazie dal coordinament scientific e redazionâl de «Fondazion Zancan» di Padue. La Cjarte di prin e jere vecje di vincj agns e, par chel, e veve bisugne di une revision par «tornâ a inviâ il confront fra etis». I pilastris dal document gnûf a son: justizie, carità, fraternitât e gjeneracions. Par Tiziano Vecchiato, president de «Fondazion Zancan», si à rivât adore di «cjatâ un biel ecuilibri fra solidaritât umane e nature, ma ançe fra dirits e biel acet». Te jentrade dal document, al è scrit a clâr: «La Cjarte dai valôrs de azion volontarie e torne a lei la Costituzion, fasintle dialogâ cu lis culturis de carità e de fraternitât sociâl e cu lis etis. E cjale viers l'avignî de azion volontarie e viers la sô capacitât d'imbastî formis gnovis, plui umanis, plui inclusivis e plui sostenibilis, di jessi societât».

Mario Zili

Adozions speciâls par Etiopie e Côte d'Ivoire

«Volaressistu fâ un regâl originâl, ma ançe etic e sostenibil?»... E tache cussi l'ultime propueste dal Centri di volontariât internazionâl «CeVi» par finanziâ i siei progjets di agriculture familiâr, in Afriche. Cuntune spese sui 30-40 euros, si podarà fâ des «adozions di lontan particolârs», come mantignî une piore o une cjavre par 6 mês; o ben un purcit o un roc; o ançe un boç di âfs, judant contadins di Etiopie e di Côte d'Ivoire. Il «CeVi», par ogni adozion, al prontarà un certificât cul no dal destinatari dal regâl.

Peraulis in dismentie par cure di Mario Martinis

RESINT

agg. = recente, nuovo, mai usato (voce probabilmente letteraria dal latino recens "recente, nuovo, fresco", con continuazioni nel parlato)

I vûl un pignatut resint.
Le serve un pentolino nuovo.

RENZIDE

s.f. = corrosione verticale fatta dall'acqua sul greto di un torrente; parte di magra che rimane scoperta in un greto di un fiume (etimologia dubbia)

La ultime montane e à fat cetantis renzidis.
L'ultimo acquazzone ha procurato molte corrosioni al terreno.

RESUMI

v. = resto (riferito al resto antico) (dal latino resumere "riprendere")
Chest al è il resumi.
Questo è il resto.

REVOC

s.m. = eco, ritorno di corrente, vortice d'acqua (voce dotta dal latino revocare "richiamare; ritrattare")
Il revoc dal cerf che al clame de mont al rive fin te val.
L'eco del cervo che chiama dal monte arriva fino a valle.

REZI

v. = governare (dal latino regere "riportare")
A son cjacaris che no rezin ni in cîl ni in tiere.
Sono chiacchiere che non reggono né in cielo né in terra.

RIBE, RIVE

s.f. = salita (dal latino ripa "riva, sponda")
Rivin fin a la rive dal Tiliment.
Arriviamo fino alla riva del Tagliamento.